

indicaturorum pòsteris, quanti sibi fuerint pecuniarum sive montes sive acervi. *Alij* id caussæ suspicati sunt, ne locus aut occasio foret insidiandi. *Alij*, ne plebs tam numerosa otio torperet, quod veri est simile ex *Exodi Mosaica cap. V. Nonnulli*, ut Reges Memphitici sub tam regio & admirabili ædificio terrà conditi immortalitatem consequerentur, quam ex magnificis istius modi structuris sibi pollicebantur. *Alij* porro *ἱεραγλυφικώτεροι* mystica & arcana quædam exsculpunt, testaturos nempe fuisse istos Pharaonas, corpore soluto & corrupto animam superesse, quæ, cum summo rerum opifici visum esset, circulo illo triginta sex millium annorum (qui est magnus ille annus Platonicus, quo decurso & evoluto omnia in pristinum statum iri redactum arbitrabantur) sibi aliud corpus genitura esset atq; factura. *Alia* quoq; opinio fuit, quæ *Gregorio Nazianzi Episcopo* arrisit, quòd Pyramides in Ægypto celebriores à *Josepho Jacobi Fil.* extructæ fuerint, ut essent conditoria frumenti (quemadmodum subterranea fuerunt apud Barbaros, quos vocabant *Siros*, teste *Q. Curtio lib. VII, 4, 24.* ubi omninò consulendus *Freinsbemi*): cui tamen sententiæ tutò quem subscribere posse negat *Salmuth in Panciroll.* quum non sit verisimile tam angusto temporis spatio, *septennij* puta, quo duravit decantata illa Ægypti fertilitas, tantas moles erigi potuisse, siquidem *Plinio* fides habenda, qui scribit | ad unius absolutionem XX. annos vix suffecisse. Dicerentur ergo Pyramides *διὰ τὴν πόρην* potius quàm *διὰ τὴν πύργον*. Ego hæc neq; disputo, neq; discepto. Posset tamen dici, à *Josepho* cœpisse extrui non ad præcavendam illam septennem, quam Rex in somnio viderat, sterilitatem. sed ex metu seu solitudine aliarum futurarum, unde forsan indigenæ tædio laborum victi & odio in inventorem incitati ipsius *συρφεῖς* molestissimo postea isti labori dicassent ac damnassent, quod testantur textus Exodici.

Longæ essent ambages dicere de templo *Diana Epbesiæ* ducentis viginti annis factò à totà *Asiâ*; de sepulcro *Mausolèo* ab *Artemisiâ* reginâ excitato; de *Babylonij* muris; de *Solis colosso Rhodio*; de *Jo-*

*vis*